

M I D D E L B U R G V M



URBS est non Insulæ Zelandiæ tantum, verum etiam in totius prouinciæ sue comitatus, quem appellant Metropolis. Middelburgum verò dictam, quidam putant, quasi in Insulæ medio situm Burgum. Eruditiores tamen, etsi relongè petita, credunt à Mattiacis nomen accepisse. Nonnulli à Metello, & eam ob causam Metelli Burgum appellant. Astrologi poli longitudinem gradibus 17. minutisq; 26 latitudinem autem gradibus 51. minutis, 48. metiuntur. Loco sita est optimo. Ad orientem solem Ermuda portu, passibus 333. abest, Exclusa 5. milliariibus, Dordracō Hollandiæ oppido XVII. Duobus ab hac vrbe canalibus Ermudam vsque nauigatur. Eorum vnus est perantiquus, sed ita sinuosus ac strictus, vt sit perquam incommodus. Alter trecentis operis rectus est, adeoque largus ac profundus, vt naues ducentis nauticis dolijs, dolum autem sex amas, vt vulgus appellat, hoc est vini plaustrum, capit, onustas ferat. Per amoenam esse aiunt, etsi aerem parum salubrem habet. Vndiq; cin-

cta est valido muro, quem ambiunt largæ profundeq; fossæ, exteriori muro firmata. Quamobrem munita est. Eius vici perpulchri, domus elegantes, Monasteria porro splendida. Illud virorum maximè, quod ordini Præmonstratensi subijcitur, & Abbatia nomine insignitum, D. Nicolao est sacrum, à Godebaldo 24. Vltraiectensi Episcopo institutum scribitur. Id demum ex integro propè, Guilielmus Romanorum Rex, Hollandiæ Zelandiæque Comes, faciundum ampliandumque curauit. In quo & ipse & Regina Elizabetha, 2. sepulchris egregiè structis, conduntur. Duabus rebus est nobile, amplis videlicet redditibus annuis, & bibliotheca, quæ librorum habet copiam. Huius Monasterij Abbas tantam auctoritatem obtinet, vt solus omnium Zelandiæ Ecclesiasticorum nomine, publicis in omnibus prouinciæ conuentibus atque negotijs consensum præbeat. Emporium est hæc vrbs omnium vinorum, quæ mari ex Gallia, Hispania, Lusitania, aliundeque in Belgium aduehuntur. Alterius quoque generis commercijs, quàm maritimæ, qua claret, negotiationis lucro est, mercatoribus haud equidem paucis. Ita diuitijs potens, vt proximis superioribus annis, ipsa sibi ab eius domino Ermudam oppidum, in quo naues portum capiant, coemerit. Paullum genuit cognomento Middelburgensem, qui propter summam in Mathematicis disciplinis eruditionem, egregiamque virtutem, corrigendo & restituendo vero calculo diei, quo sanctum Pascha celebrari oporteat, Romam adscitus fuit & creatus Episcopus, id quod eius opus inscriptum de Paschate, testatur. Edidit etiam vrbs vicinia Nicolaum Euerardum Middelburgensem cognomento notum, Iuris ciuilis Pontificijq; doctrina cum primis excelluit. Cuius rei fidem is liber facit, quem de iuris locis conscripsit. Peritia quoque valuit Reip. gerendæ, ad quam velut per gradus ascendit. Nam Præses primum fuit Hollandici Regij senatus, ac demum Mechliniensis omnium supremi, quem magistratum administrans, Anno M. D. XXXII. in fata concessit. Natis ex se filijs felix: omnes enim ingenio singulari præditi, præter Iuris ciuilis scientiam, quam erant amplexi, natura in claros Poëtas euasere. Quinque autem fuerunt. Petrus, Præmonstratensis ordinis prælatus, qui suprema Theologiæ ac Iuris ciuilis insignia propter doctrinam est adeptus. Euerardus Nicolaus, Phrysei Regis senatus, ac dein supremi Mechliniensis Præses. Nicolaus Gudius, Poëta & Iurisconsultus, & humaniorum omnium literarum elegantia perpolitus, Regius Consiliarius, & Ordinis Equitum Aurei Velleris Secretarius. Hadrianus Marius, Magnus Gelriæ Cancellarius, & Ioannes Secundus, qui adolescens, carminis excellentia nobilis exstitit. Petri quoque Ximenij hæc vrbs est Patria, in qua utroque parente natus est Hispano, vir, non solum eximia virtute probitateque præstans, sed etiam exacta Latinæ, Græcæ & Hebraicæ linguæ cognitione præcellens. Philosophiam omnem ad primè callet atque Theologiam, quibus præsidijs instructus, eruditissimum & necessarium opus, quo nostræ religionis veritatem demonstrationibus ostendit, ab hinc circiter decennium scribere adgressus, magna ex parte iam confecit. Hanc urbem anno superiore M. D. LXXIV. Auracus Princeps, obsessis annum propè, omnibus maris itineribus, quibus in eam ab Hispanis annona inuehi posset, fame tum capta, Ramechana arce, potenti que hostis classe non semel fusa, ipsam in suam potestatem deditione, redegit.